

Trahando riba Plataforma Folklore den Sector Turistico Gobierno a tene exitoso reunion cu gruponan tipico di Aruba



ORANJESTAD (AAN): Departamento di Cultura Aruba (DCA) bou auspicio di Ministerio di Cultura a tene un reunion cu lidernan di grupo Tipico dia 4 di juli 2019 na DCA.

Lidernan di investigacion di e Proyecto aki, Chencho Kelly y Johnny Scharbaay a informa na tur e lidernan di grupo presente tocante e ultimo desaroyo di e Plataforma Folklore den Sector Turistico.

Tambe a haci peticion na cada lider di grupo si por entrega, lo siguiente: (1) Un of mas potret di e grupo. (2) Un video of grabacion. (3) Un formulario A-4 of mitar A-4 cu un tiki di historia di e Grupo, p.e. Informacion di: Ki tempo e grupo a ser funda?, Di cuanto musicante (integrante) e grupo ta consisti? Menciona algun caminda cu a haci presentacion y di mas importante.

E informacionnan aki a ser pidi na e lidernan di grupo di baile, durante e tayer di señora Diana Antonette den luna di juni 2019 na Plaza Libertador G.F. Betico Croes.

Na esnan tanto grupo Tipico y Baile cu ainda no a entregae informacionnan aki, por ser asina bon pa haci esaki ainda prome cu dia 15 di juli 2019 na DCA mes of via e mail: pedrokelly@cultura.aw of johnnyscharbaay@cultura.aw. Contenido y meta di e Proyecto Plataforma ta lo siguiente:

Contenido di e proyecto:

Mirando e cantidad di hotelnan aki na Aruba, mester creae posibilidad cu na momento nos bishitantenan yega un hotel nan por disfruta di nos musica folklore. Asina experiencia di biaha cu enberdad nan a yega e perla den lama Caribe cu yama Aruba. Esaki ta conta tambe pa e prome luga di encuentro na yegada

y su lama. Pa por crea e desaroyo tan desea aki pa nos agrupacionnan di Musica Folklore, Grupo di Baile y Caha di Orgel. DCA a inventarisa, investiga y presenta un plan concreto con pa realisa esaki integralmente cu diferente stake holders y companianan cu ta organiza evento cultural.

Meta di e proyecto ta pa bin cu un plataforma cu lo crea desaroyo duradero pa nos Agrupacionnan di Musica Folklore, Grupo di Baile y Caha di Orgel den e sector turistico. Na mes momento nos ta yuda mantene nos folklore y cultura bibo y por cuminsa crea e condicionnan pa por percura cu e presentacionnan di musica folklore, grupo



di baile y caha di orgel den e sector turistico. Esaki lo por ta di un nivel haltu y profesional. Pa realisa esaki lo mester percura pa un situacion caminda tur grupo di enfoka ta sali beneficioso. Hotelnan, Aeropuerto y Terminal di Crucero ta amplia nan producto elevando e experiencia di nan bishitante y mediante di e plataforma por logra duna balor na nos artistanan local. Tur esakidoor di crea e posibilidad pa nan tin presentacionnan regular y structuralmente bou condicionnan faborabel.

Cu e bunita proyecto aki DCA pa medio di su Seccion di investigacion y documentacion ta spera di duna aporte na un punto interesante di prioridad di educacion di arte y promove nos folklore na desaroyo di nos cultura Arubano.